

UDHËZIM
Nr. 285, datë 11.3.2019

**PËR KRIJIMIN, ADMINISTRIMIN DHE PËRDITËSIMIN E REGJISTRIT TË
PËRKOHSHËM PËR LINDJET E RAPORTUARA**

Në mbështetje të pikës 4, të nenit 102, të Kushtetutës së Republikës së Shqipërisë dhe të pikës 2, të nenit 41/1, të ligjit nr. 10129, datë 11.5.2009, “Për gjendjen civile”, të ndryshuar, me propozim të Drejtorisë së Përgjithshme të Gjendjes Civile,

UDHËZOJ:

1. Regjistri i Përkohshëm në zbatim të përcaktimeve të bëra në pikën 2, të nenit 41/1, të ligjit nr. 10129, datë 11.5.2009, “Për gjendjen civile”, të ndryshuar, është një modul elektronik, në të cilin do të pasqyrohen të dhënat vetëm për rastet e lindjeve të raportuara dhe të paregjistruara në Regjistrin Kombëtar të Gjendjes Civile.

2. Regjistri i Përkohshëm, këtu e në vijim i përmendur si “moduli”, do të jetë i integruar në të njëjtin mjedis ku është i integruar Regjistri Kombëtar i Gjendjes Civile, pra, portal *web*.

3. Mirëmbajtja dhe zhvillimi i këtij moduli do të realizohet nga subjekti që mirëmban dhe zhvillon portalin *web* të Regjistrin Kombëtar të Gjendjes Civile.

4. Drejtoria e Përgjithshme e Gjendjes Civile është institucioni përgjegjës për krijimin, mbajtjen dhe administrimin e të dhënave që ruhen në këtë modul.

Përditësimi i të dhënave bëhet nga nëpunësit e zyrave të gjendjes civile të njësive administrative.

5. Në këtë modul pasqyrohen të dhënat për gjithë të lindurit e paregjistruar, të cilët presumohet se kanë shtetësinë shqiptare, pavarësisht faktit se kanë lindur brenda apo jashtë territorit të Republikës së Shqipërisë, pavarësisht se kanë lindur në institucione spitalore publike/jopublike apo jashtë tyre, sipas përcaktimeve të pikës 6, të këtij udhëzimi.

6. Nëpunësi i zyrës së gjendjes civile në njësinë administrative pasqyron në këtë modul të dhënat:

a) për të gjithë fëmijët e lindur në institucione spitalore, për të cilët ka marrë njoftimin prej këtyre institucioneve dhe ndërkohë personat që kanë të drejtën dhe detyrimin e deklarimit nuk janë paraqitur para nëpunësit për të mbajtur aktin e lindjes;

b) për të gjithë të lindurit, për të cilët nëpunësi i gjendjes civile, pasi është njohur me kërkesën e deklaruesit konstaton se nuk mund të mbajë akt lindjeje, për shkak se dokumenti “asistencë në lindje” ose raporti mjekësor është me pasaktësi ose ka rubrika të paplotësuara;

c) për të gjitha rastet kur deklaruesi nuk ka dokument që vërteton lindjen;

ç) për rastet kur akti i lindjes i mbajtur jashtë vendit ka pasaktësi ose është i paplotë në rubrikat e tij;

d) si dhe çdo rast tjetër që konstatohet i paregjistruar, për të cilin nuk mund të mbahet akt lindje në momentin e konstatimit/deklarimit.

7. Të dhënat e pasqyruara në modul do të qëndrojnë aty derisa rasti të zgjidhet. Zgjidhja mund të jetë nëpërmjet rrugës gjyqësore ose rrugës administrative dhe nëpunësi të ketë mundësinë e mbajtjes së aktit të lindjes ose të pasqyrimit të aktit të lindjes të mbajtur jashtë vendit.

8. Të dhënat që përmban moduli janë si më poshtë:

- emri/mbiemri i personit të pa regjistruar;
- emri i babait dhe numri personal i babait (nëse ka);
- emri i nënës dhe numri personal i nënës;
- datëlindja;
- vendlindja;
- gjinia;
- adresa e banimit dhe numri i kontaktit;
- arsyeja e mosregjistrimit;
- dokumentet e paraqitura që mund të jenë:

i. raportimi nga institucionet e shërbimit spitalor shtetëror, publik ose privat;

ii. raportime nga institucione të ndryshme;

iii. raportim nga vetë shtetasit;

- data e regjistrimit në Regjistrin e Përkohshëm;

- data e zgjidhjes së rastit/regjistrimi në Regjistrin Kombëtar të Gjendjes Civile.

9. Moduli përmban edhe opsionin e njoftimit të nëpunësit të gjendjes civile, në rastin kur kalohet afati 60-ditor nga data e lindjes.

Me kalimin e afatit 60-ditor të përmendur më lart, nëpunësi i zyrës së gjendjes civile kryen këto veprime:

a) kontrollon nëse të dhënat e regjistruara për lindjen dhe/ose regjistrimin janë regjistruar përfundimisht në Regjistrin Kombëtar të Gjendjes Civile. Në rast se është bërë regjistrimi i të dhënave për personin në Regjistrin Kombëtar të Gjendjes Civile, atëherë nëpunësi i gjendjes civile vendos në modul shënimin: “E zgjidhur”.

b) në rast se nëpunësi i gjendjes civile konstaton se fëmija nuk është regjistruar ende në Regjistrin Kombëtar të Gjendjes Civile, atëherë kryen veprimet e përcaktuara në Udhëzimin e Ministrit të Brendshëm, “Për procedurën e mbajtjes së aktit të lindjes së fëmijëve, në rastet kur nuk është respektuar afati kohor i regjistrimit të tyre, brenda 60 ditëve nga data e lindjes”.

10. Nëpunësi i zyrës së gjendjes civile, në bazë të të dhënave të modulit lëshon vërtetim sipas modelit bashkëlidhur këtij udhëzimi, pjesë përbërëse e tij.

Vërtetimi i lëshuar nga nëpunësi i zyrës së gjendjes civile i jepet të interesuarit për plotësimin e të drejtave të tij për arsim, trajtim shëndetësor ose përfitimin e shërbimeve të përkujdesjes shoqërore, apo në çdo aspekt tjetër për të cilin ka interes të ligjshëm.

11. Ngarkohen Drejtorja e Përgjithshme e Gjendjes Civile dhe nëpunësit e zyrave të gjendjes civile për zbatimin e këtij udhëzimi.

Ky udhëzim hyn në fuqi pas botimit në Fletoren Zyrtare.

MINISTRI I BRENDSHËM
Sandër Lleshaj



REPUBLIKA E SHQIPËRISË

BASHKIA _____

NJËSIA ADMINISTRATIVE _____

ZYRA E GJENDJES CIVILE

Nr. _____, prot
Datë _____, _____, _____

VËRTETIM

Emri/mbiemri i personit _____

datëlindja _____

vendlindja _____

emri i babait _____, numri personal dhe,

emri i nënës _____, numri personal,

është i regjistruar në Regjistrin e Përkohshëm të Zyrës së Gjendjes Civile të Njesisë Administrative _____.

Ky dokument lëshohet për efekt _____

Nëpunësi i Zyrës së Gjendjes Civile

Emër / mbiemër

vula

Shënim:

Ky vërtetim ka burimin dhe gjenerohet nga Regjistri i Përkohshëm që mbahet nga zyra e gjendjes civile.

Ky vërtetim ka vlerë juridike dhe lejohet të përdoret deri në momentin që personi regjistrohet në Regjistrin Kombëtar të Gjendjes Civile.

Ky vërtetim është i vlefshëm vetëm për realizimin e të drejtave të ligjshme të personit, të tilla si arsimin, përkujdesje shoqërore, trajtim shëndetësor etj.

Të dhënat që përmban ky vërtetim nuk janë dokument identiteti për personin dhe të dhënat e pasqyruara janë vetëm në bazë të deklarimeve të bëra nga vetë personi/kërkuesi në momentin e regjistrimit në Regjistrin e Përkohshëm